

雷波廳志卷二十一

人物志

造化鍾靈不域時地川嶽之精毓孕無異千古人材
兩閒閒氣上者爲德下者爲器

聖明在上立賢無方以忠孝顯以才藝揚乘時利見遷地
爲良溯彼先哲爲志乘光志人物第二十一

宦業

蕭鏞字雲笙其先富順人自鏞乃入廳籍補弟子員
中順天癸酉科舉人甲戌成進士後由部郎改官雲

雷波廳志

卷二十一

人物

一

南任普洱府知府多惠政卒後祀鄉賢惜未見其行
狀

陳英字雲峯道光甲午科舉人工於文章後任資陽
縣訓導恂恂善教門下士成就者甚眾

李東山黃螂人幼失怙恃衣食艱難嘗雪夜臥草薦
中凍餒交迫幾不能自存活長而落拓仍無所依後
川楚軍興乃徒步走軍營隸某將軍麾下奮勇殺賊
多建奇功由小校積階致大將後補天津鎮總兵終
於任

龔正得黃鵬人隸安阜營爲步兵狀貌魁梧循循儒雅後游陝西從雷提軍正綰攻勦獮匪多立功績已積階至總鎮授雲南開化鎮總兵後因事革職功名不終爲世所惜

徐步雲字梯仙由武生入伍拔高縣外委以勦馬邊夷匪出力歷補馬邊營中軍守備兼署左營都司已卸事去因後任挪移公款牽連被議革職戍伊犁咸豐九年釋歸管帶忠勇營以破李逆功開復原官十年擒獲土匪夏洪潰邱連三等保都司職旋署敘馬

雷波廳志

卷二十一

人物

二

營都司十一年髮逆竄陷長甯帶兵隨湘果各軍克復縣城進階游擊後因振武軍散勇滋事以失察罪奏參革職同治八年隨提督唐友耕援滇攻克縣城復舊職光緒元年帶雷威軍征本廳夷匪事平彙保參將並

賞給二品封典長子星輝由庠生保舉藍翎同知銜以知縣候補黔中材能卓著四子星漢以廩生歷保知縣任天全州訓導季子星緯提標守備長孫順修早歲游庠貢成均候選訓導均以文學仕宦世其家焉

徐璋字崑山步雲弟也由武生入行伍拔補外委隨
征粵西咸豐三年轉戰至河北帶隊打仗身先士卒
以功授西陽營千總師次阜城值河堤決璋捐廉爲
富室倡以工代賑活災民無算性靈敏所到處能親
愛小民在吳橋東光閒民有小忿事爭往訴之皆爲
剖決得其平消積案二千餘件輿情愛戴釀金建立
專祠並臚列惠政詳於大帥由是知名時大軍圍攻
高唐賊潛出殺掠璋親赴各鄉勸民開濠築堡集團
殺賊賊不能爲害其被難民婦或傷病無所歸皆爲

雷波廳志

卷二十一

人物

三

設法安置備糗糧醫藥以養以是民感其德建祠祀
之並請於當路以璋牧高唐事格於例不行而節帥
僧親王深器之委令緝捕盜賊安撫難民皆稱職方擬
大用璋旋以母老乞歸節帥憫其孝遂咨送回蜀先
署黔彭都司咸豐八年調任敘馬值李逆自滇倡亂
新竄入川慶筠高三縣相繼失守賊烽逼郡城璋率
兵先往馳擊力戰受傷昇歸人心惶惶幾無固志璋
裹創誓眾登陴固守會苦雨彌月士卒困殆幾不能
支璋親出巡城冒雨行泥濘中往來督察以大義激

厲士眾並好語撫之人感其誠皆效死用命復選精
銳乘賊隙而擊之以戰為守賊無所施其技乃賄通
獄囚乘夜放火為內應璋督兵擒斬並搜其黨駢戮
之羣賊奪氣力守五十餘日而城卒保全賊既去益
修浚城隍以防後患每日巡城閱視遇難民則以錢
米賑之民有爭訟遮訴馬前得其片言立釋以此郡
民歌頌樹坊於西門外以紀其功尋擢綬定營游擊
為降人郭安邦訐告革職下獄臬司牛樹梅廉得其
情持其事不決御史趙樹吉郡人也亦從中訟其冤

雷波廳志

卷二十一

人物

四

事乃得白然仍以降級定讞獄解後家於敘府之南
岸不預人事隱居終身子星樞光緒時恩貢生孫順
清廳庠生

附高唐士民贈詩

幸獲仁人萬姓歡頌囊施賑救饑寒遙知濟眾陰功

厚指日封侯錫信傳

徐公銜命至高唐百姓聞風返故鄉天佑善人終有

報子孫榮貴滿華堂

詰奸努目似金剛彈壓官軍保善良待奏凱歌求主

帥奸留仁者鎮高唐

仁者多勞此語真巡查兵勇必親身魚耶士庶無他

報高立生祠配樹人

附敘州府紳糧德政坊序

都戎徐公崑山先生久歷戎行奇勛累著所至之處

凡可以保衛地方利益生民之事知無不為民心愛

戴其情甚深受知當代巨卿如僧邸節賽閣節吳仲
昉張介泉兩制軍張祥和撫軍皆為卓異積官至今
階來鎮敘州年餘值李逆新竄入川慶筠高三縣相
繼失守距敘州府城僅百二十里公先馳兵往援筠
連擊賊力戰受傷昇歸其時人心皇皇幾無固志賴
公裹創誓眾布置城防剋日登陴躬親督率比賊至
而守禦已固不敢遽攻民心由是始定厥後孤城久
困又連月苦雨幾有累卵之危公事事預防隨機應
變無不洞中肯綮兼之晝夜巡防城上往來風雨泥
滓中不遑寢食舌敝脣焦頑懦見其如此亦為之感
泣守禦益嚴計無所施又賄通縣署卡犯謀為內應
百餘人乘夜放火奪門而出城中震駭公立時督兵
擒斬數十人並搜獲餘黨梟示頃刻而定匪徒為之
奪氣敘郡卒以保全凡始終其事五十餘日備極艱
辛不辭勞瘁至於招降唐屬百餘人尤徵德化真可
謂竭盡血誠有功於地方者矣自賊敗走後深溝高
壘日夜督工尤關心民瘼每日巡城一週拯濟難民
分給錢米日以為常民間鼠牙雀角得公馬上言

雷波廳志

卷二十一

人物

五

悉罷民之歌功頌德送傘與衣者萬家余等以傘與
衣皆非不朽之物因於通衢建一坊垂諸久遠俾此
郡士民之過其下者咸曰此我徐公之實錄也闔郡
紳糧謹序

王耀龍少習邊事以普安營馬兵隨征各邊夷匪積
功補把總嘉慶十九年涼山生番滋事多提軍統兵
進剿耀龍隨營攻克大小谷堆至伊布噶拉大軍阻
險不能進耀龍別覓小徑率勇士攀藤上突出夾攻
遂大破之拔出難民甚眾事平奉

上諭王耀龍於深林密箐之中首先躡覓路徑官兵得以獲
勝著加恩以千總用由是顯名歷任普安馬邊城守

各營守備先後署安阜營都司及泰甯營都司後任
提標游擊

馮正朝牛吃水人由行伍出身歷躋顯要後任陝甘
督標後營游擊多樹勛勞卒於任所

吳洪晏字海樓玉恆長子讀書之餘兼習弓馬騎射
負文武材辦理地方夷務多著勞勩後援例爲貴州
候補通判署理婺川縣知縣潔己愛民人懷其德

郝騰龍牛吃水人幼嫻武藝由行伍立功補本營把
總嘉慶二年護理普安參將印務整頓營伍認真操

雷波廳志

卷二十一

人物

六

防夷情帖然地方安靜

范漢相道光時以貢生任漢州訓導學問優長門多
桃李從游者經其指授爲文有法多掇巍科以去
吳映璋由歲貢生任鹽源縣訓導學問淹博善于啟
迪庠序之士皆尊事之

馬暢然字惠軒由歲貢選授資州并研縣訓導在任
二十餘年品端學富循循教人門下士多所成就

王化鼇字巨生黃螂人讀書不成去而學劍入行伍
補普安左營黑角汛把總磨盾草檄雅歌投壺卓然

儒雅後帶兵隨征建昌夷匪駐營大相嶺夷勢猖獗
圍主帥大營化鼉以兵少不敢戰赴各處求援皆不
應乃作從軍行以寄憤懣詞曰相嶺山高險而陡駐
兵百名便防守兵驕官懦畏蠻強十日換防咸藉口
憲意換官不換兵始派粗材賦遠征行李蕭蕭從四
僕單騎使與虎狼爭甫過中所壩聞信生驚訝將軍
被圍長老坪死生未卜在今夜心急直馳馬似飛到
處求援往解圍賀蘭進明今復見只顧烹鮮不顧機
大義申明兩三番優游命僕備征鞍知事難諧思別

雷波廳志

卷二十一

人物

七

救小哨沿門議集團人人畏賊如畏虎推言奉命守
桑土哭求何異申包胥呼天不應幾無主復遣從人
往督師一刻如年魄欲褫忽報兵來喜顏色有如大
旱雨雲施登促往策應木立不聽令跨馬先行並急
呼若延片刻恐無命激勸能教義膽生陸續相隨岸
峯行聲勢果然撼山岳自視命若鴻毛輕底事蒼天
縱逆夷戈頭難返夕陽墮時旣昏黑雨復猛我兵徧
體皆淋漓路險林深灣又曲進步鎗完礮聲續兇酋
爾黑伏山腰叢中橫截難舉足彼高我矮仰面攻先

登無不血飛紅余非輕視賊如鼠三次爭先爲急公
四圍叢莽皆夷伏矯健如猿伸且縮狹巷短兵苦相
持矢石如雨爭圍撲殺敵聲喧賊不奔困獸猶將險
要蹲督戰渾忘血被面前兵役竟無存突聞大呼
事不濟丈夫羞被腐儒議拔劍將揮頂上頭劈頂矛
摧奈落地躍起猶呼後隊軍可憐半雜猥夷羣欲救
自知孤莫濟權依藁棘待朝曛大雨剛停復大雪衣
溼身僵胸欲折終夜時間鎗礮喧全軍無恙心猶熱
雪餘天曙霧煙開山頂諸軍捲隊回相見各驚余尙
在殘軀何幸復歸來事後回思覺無謂四人何堪當
一隊排難雖同魯仲連殺身幾似申無畏吁嗟乎博
浪椎秦雖無濟報恩千載咸稱義我亦捨身以報人
未必人能知我意歌成各營傳誦咸豐十年提督蔣
軍門調兵征勦李逆聞化鼇名檄入幕府襄贊戎機
升補千總惟性情峭直不合時宜名終不顯竟以千

總終

錢發松字柏亭海腦壩人生有雋才臨事開朗多智
計少應童子軍不售乃援例捐從九職候補雲南任

母享司巡檢時值獬匪滋事到處騷然發松教民團集丁壯協力禦侮保障屹然百姓安堵無恙後罷職家居時遇夷匪滋擾猶復整頓團練保守隘口以衛鄉里

鄧顯章字煥亭由吏員捐分湖北任平靖關巡檢到任清苦自奉多裁陋規民享其利

匡國柱少嫻武略入行伍爲步兵道光二十六年隨參將曾得勝出師鄂省征勦髮逆衝鋒陷陣屢建奇功保授儘先千總後復帶隊隨大兵解武昌城圍擒

雷波廳志

卷二十一 人物

九

獲巨匪保儘先都司補湖北督標右營守備

何成章字斐然形貌魁梧慷慨多大略少時貧苦以功名自奮後游甘肅隸金將軍麾下從征獬匪多立戰功保都司職光緒初年咨送回蜀以都司歸督標候補現任維州右營守備

孝友

薛恆昭把總薛時敏子生有至性母氏陳抱病危殆醫藥罔效恆昭年十五割股以進陳病立愈而刀瘡亦漸合家人罔有覺者臨歿時乃舉以告子孫焉

李化昌千總李玉元子以戕邊營步兵隨父出征貴州竝援湖北師次德安與賊戰於三坡港父在前敵羣賊圍攻之化昌見父急奮勇直前連殺數賊欲衛父出重圍而賊至甚眾父子並死焉化昌受數十傷徧身血赤同行兵士廖希傑收葬之

韋光宗字顯庭以儘先把總署專城千總天性友愛撫弟光耀恩誼備至弟年少好爲夜游恆終夜不歸光宗婉勸之不聽則坐於門以待至夜分不寢光耀感悟由此改行其事兄亦謹飭不整衣不敢見兄雖

在燕居不命之坐不敢坐同居數十年每食未嘗異席友愛之性老而彌篤鄉黨稱之
刁其興箐口汎人生性至孝曾割股愈親鄉居與人排難解紛多行善事同治三年夷匪出擾其興督團拒敵身受十餘傷登時陣亡團眾見其奮不顧身皆勇往拒敵夷眾乃退

李學謙字友三早入邑庠待其弟學才有至性衣服玩好恆推所愛者與之家殷富鄉居歲所入租悉以供弟用資財厚薄未嘗爭校雖極困乏亦處之晏如

生平與弟言意色無忤其天性殆有過人云

趙建忠牛吃水人家於香煙壩母氏陳青年守志撫建忠成人躬耕自給咸豐三年夷匪出擾居民逃匿建忠念母年邁艱于行乃負之而逃至半途同行者勸令棄之母亦願就死令其獨去以存趙氏建忠不忍疾力奔趨未數里夷眾追及乃並殺之死後母屍猶在背也

張希厚牛吃水人貧不能娶家徒壁立母年六十餘傭力奉之孝養維謹冬夜母苦畏寒先爲溫席又嘗

雷波廳志

卷二十一

人物

十一

負母游市上隨所欲之進以甘旨至晚乃負而歸如是數年往返不倦後母死隨眾入山採樵途逢霹靂震一人死希厚急扶之於懷須臾而蘇人以爲異龍正揚天姑密人母病垂危醫藥罔效正揚焚香祝天割股以進母病尋愈正揚亦無恙

姜先成天姑密人性慈愛善待宗族光緒三年歲飢穀價昂族人多不舉火先成賤售己田以貲分給之所保全者甚眾

陳世培天姑密人父義和光緒辛巳年被夷擄入涼

山世培性純孝哭泣思慕欲往贖而苦無貲因嫁其妻得十金輾轉尋入深巢得其父所在殊夷性貪黷索貲倍多不肯返其父世培不得已乃自留爲質而換其父歸在夷巢一年隻身跳出或謂精誠所積鬼神相之故卒能免也

曾禹修牛吃水人所居離場遠光緒十六年夷匪大亂夤夜入其室縱火焚居禹修聞變已起而逃轉念母年老猶在牀臥因返身救母爲夷所得舉家皆被擒賊以繩繫其眷屬驅之歸巢母老不能行賊將棄

雷波廳志

卷二十一 人物

三

之禹修踊躍號泣獨負之以行賊不敢加凌逼聞以夷奴代負次日兄燕修弟治修措金往贖夷願奢眷屬不能還禹修命以所持金付夷獨易其母而歸妻子無所顧後參府謝公嚴飭聽差夷目回巢清理禹修乃還眷口亦隨後繳出

王正安居東鄉貧無擔石儲鬻薪奉母每得食不敢先嘗俟母食畢然後食母雙目瞽動作需人正安悉心服侍體愛入微恆先得其意之所欲家無手指炊爨灑掃皆親之至爲母滌裾禪無怨色人以爲難後

從軍征夷被擄去乘隙脫歸毫髮無損人謂孝感所致

行誼

薛時敏原名懋功以那比汛把總帶兵征白蓮教匪累建奇功主帥器其材授陝西陽平關千總時敏因親老不能迎養乃棄職以歸家居奉母廳主富公得其情謂之曰君以母老去官誠孝矣然獨不念揚名卽以顯親乎時敏對曰公教我誠當然吾母衰年倚閭情切終不忍以彼易此後母死乃更名入伍隨征

雷波廳志

卷二十一

人物

三

黔楚立功升授把總終老于家子二長俊昭征夷匪陣亡次恆昭事親以孝聞均有傳

王名相監生世居濫壩子鄉父仕朝嘉慶中採辦廣餘鄉西蘇角銀廠以邊衅干

國憲牽連被誅名相時年幼痛父死非命欲雪仇恥爲幹蠱子痛自刻勵稍長卽能家所居鄉逼近夷巢而地利饒沃山林川澤之利甲全廳附近州縣窮民爭往墾闢名相時出己財助之力爲保護未十年西甯河兩岸居民附益數千家深山窮谷闢地幾徧皆賴

名相力也道光十七年夷匪滋事提督余步雲統兵
進剿倉猝受降夷亂未戢十八年廳主劉耀庚莅任
再謀戡定聞其名命帶鄉勇五百人驅策防剿名相
急父仇慷慨任事山川險隘皆其素經夷情又所稔
悉遂分布鄉勇防各要隘而自駐營於三稜岡野宿
叢薄身不解甲曾以四百人破夷匪四千之眾其共
事軍功李萬金等亦饒智勇迭殲巨匪威名大震通
巢畏之十九年邊事平各邊廳議增營汛名相言於
劉公曰三稜岡要隘也城之可以攝通巢馬頸子宜

雷波廳志

卷二十一

人物

古

設汛防爲犄角守黑角乃能防入寨守羅三溪乃能
扼大院子劉公親往相度韙其言悉從之而丁盧各
支夷聞城三稜岡有碍出入遂出死力相撐拒名相
急帶鄉勇扼田家壩剋期修築諸夷乃畏伏不動至
二十二年各營汛工程一律告竣邊民安堵劉公上
其功績欲官之辭不受家居治團練保鄉里設卡防
於竹耳窩蠻路口以防夷匪出入復於楊鼓腦蟒蛇
埂迴龍灣蛇窩厚山等處堅築碉堡以衛居民農務
暇時則調集各鄉丁壯至茶園埂操習技勇行止進

退皆有法取人以膽勇爲上技藝次之所練團丁皆能耐勞苦習險阻十人可敵數十人有警則互相援應無論佳節良辰及夷匪多寡但聞號礮卽行各團丁皆負雨具裹乾糧跟蹤追擊晝夜兼行不見敵不返其料敵尤多奇中策其何處來必由何處去堵截之無不獲者以是諸夷畏懼聞其團至卽將所擄財物退還並以所蓄之牛羊爲奉涼山諸蠻酋聞其名多持雞酒拜膝下稱假子以爲榮樂常帶團勇數十人由崖慈壩間道入大涼山鎮撫其夷皆俯伏聽命

雷波廳志

卷二十一

人物

五

晚年策一騎行竹耳窩山道中僅一僕相隨至山半蠻匪百餘人伏林內欲刺之矛已貫馬前乃叱之曰汝曹何爲諸夷矛悉斂跪伏齊呼曰來接王老爺其威之攝夷如此故夷中婦女每呼其名以止兒唬皆實事也同治四年年七十三無疾卒死之日各鄉民聞之慘沮無人色蓋失此長城知夷匪之必亂哭保障之無人也或曰名相貌雄傑聲如洪鐘生平嚴峻自持見者畏憚其保衛鄉里懾服諸夷皆有所自來云

王朝清名相次子隨其父辦夷務立功保候選府經歷性寬洪樂於爲善光緒五年廳主余上富稟請濫壩子創設汛防朝清慨然割已宅之半爲衙署兵房其急公好義如此可謂能紹前徽矣

吳玉恆武生家於牛吃水之獅子坪地秉性慈愛樂善好施尤能矜恤貧苦所居離場遠修築石寨可以禦夷咸豐中夷匪擾牛場附近居民爭往走避老幼男婦約數百人玉恆分別安置井井不亂竝開倉賑之耗穀百餘石無所吝事後亦未取償至今咸感其

雷波廳志

卷二十一

人物

六

惠後以子洪晏貴

贈奉直大夫

吳玉潼牛吃水人年十六失怙弟玉書玉恆皆幼潼善撫之怡怡友愛比長成教以弓馬兄弟皆入武庠潼獨持家兄弟子姪無異視書與恆亦事兄謹飭不爲異言年各六十餘同居一室朝夕親愛子孫眾多無敢言分居者其友于之德足以垂示後人至今吳氏繁昌皆當以此爲法

劉廣順海腦壩人生平德性純粹器量寬宏與物無

忤享年一百三歲後以耆老仰邀

寵錫發銀建坊題曰熙朝人瑞其家有園圃種苞穀內一株發十八苞聯綴於上人祥物瑞機應自然皆以爲盛德所感

田萬貴字德圃海陽壩人性敏好學不求榮進生平樂善好施至老不倦常獨力捐貲修黃鵬小南門內及北塘坡石板大道其餘善舉皆極力爲之司馬譚光祐表其閭曰品學兼優

陳金魁海陽壩人生性孝友於父母前極善承順自

雷波廳志

卷二十一

人物

七

少至老無一事稍形觸怒孺愛之德出於至誠其弟名金玉性亦和平待親友鄉隣最爲真摯未嘗與人爭競一生未至公衙兄弟怡怡互相友愛鄉人皆以厚德稱之

郝思志牛吃水人生性和藹友于兄弟家庭之內皆化其德雖婦人孺子亦無爭競之言爲鄉里矜式趙汝中楊文元吳連俸劉思珩慷慨性成急公好義先是雷波未設專學廳童應試者皆附考屏山往返艱難肄業無所四人呈請開學幸蒙允行嘉慶九年

奉准部覆每屆取進三名維時學校初設經費繁多
四人竭力倡捐贊成其事人咸以爲義舉
劉國泰牛吃水鄉監生爲人和厚樂善好施道光十
二三年歲大饑貧民艱食閒有流爲餓殍者國泰舉
累年餘粟開倉賑之其全活以千計復施棺木以助
埋葬鄉里皆感其德後年七十餘乃卒子孫繁衍世
業詩書人咸以爲積德所致

劉正義國泰次子府學恩貢生博學能文生平手不
釋卷於讀書之外毫無所干鄉居數十年足迹不至

城市後進之士仰望丰采而不能見其面晚歲家居
精習內典神志湛然光緒元年夷匪擾牛場其子孫
爭欲走避正義怡然曰死生有命不可逃也止其家
弗遷終日正襟危坐賊至牆外聞室內讀書聲驚疑
不敢進遂各引去其臨事不亂若此後年八十餘而
終孫心安歲貢生就職訓導

許盛朝字蘭村讀書游庠以躬行爲本事父母至孝
敬愛兼至能得親心兄弟閒怡怡友愛一門雍睦生
平不苟笑言舉動皆有禮法雖閒居燕坐無惰容不

傾倚衣冠必正行步必莊無論識與不識皆知其爲老成人也家有喪事遵用文公家禮以僧道薦亡爲誣力除弊俗每逢朔望整肅衣冠宣講

聖諭以化愚頑鄉民興感者甚眾

唐勳揚字堯臣邑增生父名逢治年二十餘鰥居勳揚時甫兩齡其父誓不再娶人稱曰義勳揚旣長博學能文有聲庠序生平講求德性毫不妄干家貧以教授爲業盡心訓誨不計脩脯遇孤寒子弟尤極力培植後進之士多所成就

雷波廳志

卷二十一 人物

九

萬登貴字達卿秉性忠厚喜周貧乏鄰人胡長壽聘何氏女爲妻貧不能娶何女鬻薪於市衣弗完至露其肘登貴見而憐之知爲長壽未婚妻因貸以錢二十千使之完娶事後亦不索償遇夷地難民必周以錢物又常買棉衣散給寒苦其行事多類此次子科進光緒戊子登賢書人咸以爲陰德所致

楊正芳年十九時娶妻徐氏徐性賢淑善事翁姑治家亦勤儉生子寶林甫兩歲而徐病歿正芳念氏賢且有嗣續因矢不再娶撫子鰥居生平無二色寶林

既長由例監充本廳團總以征紅燈教匪功彙保貴州試用巡檢後因正芳年老未肯遠離至今父子依依子孫繁盛正芳年八十有六精神強健飲啖兼人殆以德爲天所助云

吳應聘居牛吃水鄉家殷富而樂行善事嘗施己地建天堂廟文昌閣並捐貲助之廟宇雅靜可爲鄉里子弟讀書之所晚年學長生術年八十九而終

吳祖堂字盛明天性孝友年甫壯父永達隨官兵征西域數年未歸家貧無擔石儲有弟五人均幼穉祖

堂獨力承家經營刻苦撫諸弟成立各隨其材質授之以業仲懷德以武功歷川北千總季祖馨聰穎能讀不惜重貲延師教訓後卒成名皆其培植力也生平怡怡友愛兄弟間不計貲財視諸弟窘乏必罄所有以與之同居數十年未嘗詬誶愛弟之忱老而益篤諸弟亦敬事之不敢稍怠

羅玉芳濫壩子人以軍功保儘先把總生平坦平樂易與物無忤遇公事勇於自任同治初辦理本地夷務隨事補苴多所裨益光緒五年復約同紳耆請設

汛防以衛地方添修兵房三十餘間籌辦木料貲費竭盡心力無所推避至今賴之

喻萬先濫壩子人持家嚴肅內外整齊子孫眾多皆以耕讀爲本尊敬長上和睦鄉里不敢稍踰禮法卽在孩提亦謹守規矩家範足爲一鄉矜式

唐仲友濫壩子人以勤儉起家爲人長厚好施重然諾尙信義鄉人緩急借貸無不慨允其子承懷亦有父風光緒五年捐地土一段以爲濫壩子汛公地

許洪順生有勇力童時見二牛鬪於野以手格之鬪

雷波廳志

卷二十一 人物

三

遂解旣長軀幹雄偉益饒膂力用鐵刀重三十餘斤咸豐末年從振武軍擊李逆戰功卓著皆壅於上聞未獲一階半級乃歸家務農同治八年廳主楊澤溥募鄉勇設雷威軍洪順投効爲哨長駐防牛吃水海腦壩各鄉屢獲奇捷曾遇夷匪於麻柳灣隨行六十人而賊來數百四面合圍聲動崖谷洪順屹然不動俟逼近乃揮刀砍殺斃賊渠數人洪順亦受重傷血染衣盡赤夷匪自是畏之聞其名卽逸去光緒六年夷匪竄至東門外離城僅里許人情洵懼幸洪順斬

其渠餘匪乃退爲哨長二十餘年大小數十戰未嘗
敗北先後移守各隘保衛地方均克勝任後隨大軍
征夷匪攻克母狗坡油羅岡各要隘保授儘先把總
生平椎魯若無能遇賊卽勇往奮發在諸哨長中最
爲知名唯好骰博一生所得貲財半償負債識者惜
之

范正乾字健菴普安右營外委少時以鄉勇隨廳主
劉耀庚征勦夷匪多著勞績後隸右營爲馬兵值乍
溝添設汛防以通入城大路卽命正乾署外委事經

雷波廳志

卷二十一

人物

五

營保障道路無虞同治中復增設新營盤建枋廠梳
杆巔各隘卡皆調正乾爲軍功首事經理爲人性情
質實不避險難在右營勞苦最著年五十餘尙精騎
射在校場角藝同輩莫之及遂拔左營外委光緒五
添設濫壩子汛防又調正乾任之年七十卒於任
鄭耀楚黃螂人誠實不欺素行忍讓曾捐貲百千以
息鄉鄰命案之累人表其門曰仁厚可風
汪世泰爲人質厚一生無妄言嘗以錢物陰行善事
不令人知事後乃有覺者以此人多稱其德量

李瓊林王順興宗祥盛皆舖民爲人質實交易不欺
李尤和厚一生無怒容從不與人爭競二人前後皆
拾人遺金一毫不取待其人而還之人感其義題扁
於門曰拾金不昧

藝術

丁善章精醫以術濟人不計貲財道光中大疫配合
藥物以濟病人全活無算

陳汝明習岐黃術最精每遇疑難大證應手奏效性
仁厚愈人病不索貲財且以藥餌周濟貧困道光十

雷波廳志

卷二十一 人物

三

九年兵燹之後疫癘盛行貧民不能延醫藥死亡日
繼汝明配集藥物廣傳良方遇病者卽與之並不索
值全活無算人多感其德

黃景福字建安通六壬奇門術無不驗有占失物者
來時形色匆遽初未言景福迎謂之曰汝問失物耶
此小事無足深求汝可急歸遲則汝妻不救矣其人
惶懼奔歸妻果就縊急救之乃甦蓋其妻以失物見
疑憤而自縊微景福言幾不救咸豐八年挾術游於
外至敘郡宿逆旅中見二鼠晝臥於庭逾時不去人

咸怪之景福曰非吉徵也以我法論當主兵亂並此屋亦燬於火其九月十月之交乎已而李逆至悉知所言由是徧游川東北逾年乃歸所親密叩之曰子以術遨游思佐當世立功名何歸之遽也景福喟然曰斯術也五百年而後興不當其時則不驗吾道窮矣由此家居不出時與人射覆爲戲後以狂易終盧正常東關外夷民幼好讀書習奇門遁甲六壬術隣有兄弟爭產者久而不決弟忿甚懷刃往刺其兄適正常在座不敢發乃潛伺於門外兄懼欲逃慮不

雷波廳志

卷二十一 人物

三

能脫以問正常曰汝踰東角牆出急折而南向大路遇婦人負幼孩手持一雞隨之急走保無恙如其言果免於難由是人爭奇之正常術旣精常憾產於夷又處邊地居恆鬱鬱不自適乃裹糧外游徧歷名山大川數年乃返旣歸值雷波夷務蠢動邊事日棘遂隻身入夷巢陳說

國家威靈曉以利害諭諸夷安處無動動則必誅而諸夷弗之信正常乃誘賺其渠百餘人出漢地悉誅之諸夷測其謀忿憾刺骨屢遣人刺之皆不能殺後以

老終於家

仙釋

修路僧姓名不傳嘉慶初年嘗在江邊修路獨荷鐮不與人偕江邊有畏途曰大險小險由石壁中開尺道光滑難行其下爲金沙大江失足卽墮貧民負擔者皆不敢由此行僧鑿而寬之且鑿石級往來行人皆稱便餘所修治約二百餘里新灘鄉民李元義鄉里善人也見僧勤苦日煮茶餉之贈以金錢則不受臨去謂元義曰汝謹誌之對岸吳家灣有一老嫗依山結屋而居嫗若死汝宜急去慎勿居此元義誌其言後聞嫗死遂遷去未幾對山崩江水塞流元義舊居皆汎溢始知僧異人也

陳真人不知其所自來嘉慶時在城南那比渡洞中修煉洞寬廣數十丈由洞蟻附而升上復有小石窟大僅容人傳爲真人坐煉之所朝夕不易其處往來者常見之與之食則食不與亦不饑如是數年人皆以爲異後一旦失去不知所在其坐處砂石皆光淬廳主陸公題三字額於洞口曰天仙洞雷波別號仙

城或以爲取義於此也

謝道士不詳其名居牛吃水之龍鳳山山有一廟景最清幽道士住其中朝夕修煉嘗入山採藥以濟病人全活無算羽化後鄉人思其德塑像於啍啍寨川主廟內附祀之至今香火不絕

淨先觀音閣老尼俗姓劉氏以小故見棄於其夫不忍他適乃祝髮爲尼事佛虔誠持律精苦菴有薄田數畝率其徒種之僅足衣食婦女入廟從不勸人布施亦罕至人家閨壺辛苦數十年撙節用度集貲建

玉皇樓廟中常奉不豐而香火獨盛佛前燈熒熒然晝夜不絕固清淨禪堂也老尼旣死其徒輩爲人漁肉幾不能自存非復昔年光景矣